

欽
定
全
唐
文

欽定全唐文卷四百九十九目錄

權德輿 十七

唐故宣武軍節度副大使知節度事管内支度營

田汴宋毫潁等州觀察處置等使金紫光祿大

夫檢校尚書左僕射同中書門下平章事隴西

郡開國公贈太傅董公神道碑銘

并序

唐故中書侍郎同中書門下平章事太子賓客贈

戶部尚書齊成公神道碑銘

并序

唐故楚州淮陰縣令贈尚書右僕射王府君神道

碑銘 并序

唐故四鎮北庭行軍兼涇原等州節度支度營田
等使開府儀同三司檢校尚書右僕射使持節
涇原諸軍事涇州刺史兼御史大夫上柱國南
川郡王贈司空劉公神道碑銘 并序

欽定全唐文卷四百九十九

權德輿 十七

唐故宣武軍節度副大使知節度事管内支度營

田汴宋亳潁等州觀察處置等使金紫光祿大

夫檢校尚書左僕射同中書門下平章事隴西

郡開國公贈太傅董公神道碑銘

并序

漢興五代孝武思理膠西相陳天人之際王道之端昌言
大對統紀條貫純嘏積厚遠而寢明帝唐九葉順考古道
隴西公兼將相之重承尉衛之崇啟心宣力作率慶事陟

格宗工能積其烈公諱晉字混成河東虞鄉人廉忠溫厚
絜矩通理秉義以立故不爲利疚知動之微故每與吉會
初肅宗受端命以合兵車思欲去元元於湯火致王度於

金玉以文告威讓遠猷密布

命一作

之爲重也故公解巾披

荆校文視草凡三徙官被以采章代宗御天下乃清吏職
以爲文憲彌綸陪貳事任百辟交修則理道洽故公再入
御史府三爲尚書郎歷祕書監長府奉常武侯之亞今上
建皇都以纂鴻業思代天工俾寧方內故公出入屯夷昭
明有融中居大僚以至柄用貞元五年春三月拜門下侍

郎同中書門下平章事居五年除禮部尚書用耆碩俊德
轉遷兵部分正宏化以本官畢命爲東都留守東都畿汝
州都防禦使安危注意以左揆持相印充宣武軍節度汴
宋毫潁等州觀察處置等使十五年二月丁丑薨於位享
年七十六罷朝三日追命太傅有司易其名曰恭惠職喪
法賻皆峻彝等所以視其踐履而加優之也初公以祠部
郎爲出疆從事北方之強驕蹇沓貪伐功怙力徵我厚幣
使臣指顧公攝其詞詞達氣直虜皆震伏殫威命於專對
輝光華於外區仁者之勇沛然餘力其爲太府未浹日而

理乃珥貂蟬實兼憲丞含章以承顧問秉直以司紀律修起故事京師肅然其爲華州徵赴行在以祭酒亞相使於北河其往也薊門不出關東多壘習俗故態且相附離公則破其從約使循軌道其還也蒲坂旣阻王宮未清焚焚二逆恣睢相合公則折其凶謀因以鬱沒憑軾有勞扈蹕而旋益用尊禮大其職業司徽循也五校嚴備持重而不苛處綱轄也六職遵修舉直而不紊典禮樂也百神咸秩薦信而不黷其爲相也上戴元聖下熙百工柔惠小物協寧大政推明常古之制章敘理平之業粹和而不耀敬讓

而不居言陳於前不可悉數拜章八上然後得請其撫封也尤爲難理先是在宥推恩參授兵柄至有恃凶器以邀好爵者氣燄不還風波相沿是邦再亂人用恟恐上以爲陳留天下之郊也非素重臣不可以率先賦政公旣受命與一二從事記室儒服而前不待裏言不恃扞衛寬信夷易闡然風行長城大蔡蘊在靈府悍將伏罪齊人樂業四鄰諸侯折中於公居四年政成力疾累求入覲因條陳利病請制於未然上難其繼以致沒代噫夫一邦之人得公而理失公而亂劫介夫殺大吏猶原燎川潰於不可遏嚮

公之嘉猷密疏如前知焉其明智歟董氏在春秋時書法不隱在戰國時贊明命聞於諸侯自膠西而下淳耀滋大在魏有司徒昭在蜀有尚書令允扶義納忠以幹機衡其族舊矣公曾祖仁琬皇州博士祖大禮贈右散騎常侍考伯良開州新浦主簿贈尚書左僕射三代有令德而無貴仕蕃祉所鍾發爲追崇宜哉有子四人祕書省著作郎全道祕書郎溪大理評事全素太常寺太祝澥等其承學也專其就列也敬斬然而孤纍然以哀日於先遠象數協吉以某年十月丁酉奉理命家法薄葬公於河南縣萬安山

之原以前夫人南陽張氏繼夫人京兆韋氏祔焉從周禮也惟公自筮仕至捐館四十五年無伐善無違德歷官三十六皆以理効聞自建中以還居中分閫再調鼎實一人而已范文子所謂厚德者能享多福惟公有之全道等猶懼懿鑠之不永於後與陵谷之有遷也以德輿奉行公之命書者三宜金石刻故跡其誄諡而爲之銘其詞曰

后王財成雋乂昭明以建皇極甫申居內方邵理外周邦是式於惟隴西求福不回文武宣力調和公鯨整訓長轂柔惠且直膠西章章道可佐王屈相下國綿代儲慶至公

而盛位實配德子子干旗昔往浚都俗旣紓息翻翻素旗
今旋洛師人用悽惻惟是壤樹資於四布萬安之側德輝
在茲永代有詞於以篆刻

唐故中書侍郎同中書門下平章事太子賓客贈

戶部尚書齊成公神道碑銘

并序

有唐文學政事之君子曰相國齊成公諱抗字遐舉清方
粹溫絜矩秉懿明誠盡性切磨化育之道精義入神旁魄
天人之際以忠事君以病乞身乃去台宰乃儕商皓然後
徹琴瑟啟手足歿齒無違德以從先大夫於九原易名曰

成不亦宜乎公定州義豐人自太公表東海桓公匡天下
爲國爲家或哲或仁烈祖贈太師府君諱澣歷給事中中
書舍人吏部侍郎止於平陽太守出入陟降中行山立至
今言開元名臣者稱公有遺直遺愛焉實生先公贈國子
祭酒府君諱翽履道貞厲仕至左龍武軍倉曹積厚於上
流光於下其位不充故大受於成公公旣齒而孤哀過成
人屬幽陵橫潰中夏如燬奉太夫人安輿違難於越得子
州支伯之故地而偕隱焉誅草茅以順居息悅山水以資
仁智方茂天爵用觀靈龜嘉招重問奔走以狎至虛已宏

道從容而翔集吳郡張相君鑑方以仁義理濠上得君爲
榮及進律於洪成師於岐累爲命介若驂有新建中中戎
王謀大和會以休寧西方右扶風綿亘汧隴地當甌脫且
有成命正其經界公實佐中權登壇涖盟得其情數與之
約結克就衣裳之會用銷邊鄙之警自解巾三遷至殿中
侍御史俄屬涇旅竊發羣凶挺災天兵展義於甸內王公
死難於理所百舍奔問至於行宮拜侍御史有詔以蕭黃
門復布愷澤於東夏命公爲工部員外郎以贊焉復命轉
倉部郎中李懷光阻命於蒲連兵未解關中饑旱經費不

足轉粟饋軍濟時之艱患求才急病命使以轉達遷兵部
郎中兼御史中丞以董其任俄拜諫議大夫當軸者不相
容坐婚親細故出爲處州刺史先是山越寇攘蕩覆城寺
公乃卜勢勝之爽塏因習俗之便安三時不害百堵皆作
朝典陟明拜蘇州刺史吳實劇部大田多稼浮徭冒役吏
禁或弛占著名數戶版不均公乃閱其生齒書其比要強
家大猾不得蓋藏公持單輕與之紓息已日乃孚厥猷茂
焉遷潭州刺史御史中丞湖南觀察使以嚮時二郡之理
而宏大之其仁可知也左曹理本徵爲給事中周郊寄重

擢爲河南尹盜有宋瞿曇者白晝椎剽爲郡偷囊橐三川
病之幾三十年公法令嚴具網絡張設名捕魁宿使無遺
類指顧之間擒擿如神乃作祕書章明文雅修舊以起廢
乃作太常統和神人節事以辨志便蕃大僚其道乃光德
宗皇帝方以堯舜氏聰明之道馭天下用賢人充相位拜
中書侍郎同中書門下平章事熙九功之歌質百官之成
損益文獻化裁形器精微以折衷密靜而不伐或事隱於
造膝或言行於沃心初天官氏每歲表他曹郎二人閱多
士試言第其甲乙春官氏俾考功郎選孝秀之親故者而

進退之公以冢宰少宗伯爲官人取士之本蓋天子有司之重寄至於避小嫌亂舊章適滋旁岐孰謂扁鵲蹇蹇坦坦之道豈如是耶然後關康莊作衡尺遵公是之路去自便之私天下之人謂之理道尋有詔修國史昔孔父無位以空文爲一王法公當盛聖之代用宰司總直筆其於褒貶勸懼明焉勤慮盡瘁積成寢恙累章乞告改太子賓客遭罹不淑贈戶部尚書時貞元甲申歲夏四月春秋六十有五夫人河南獨孤氏某官某之女賢明蚤天繼夫人蘭陵蕭氏某官某之女仁順有禮法嗣子餗銜恤毀瘠侍公

裳帷以某月日祔於東都某原喪祭哀敬君子以爲有後
惟公深而通肅而寬出處動靜必以中正敬用五事暢於
四支資性儼恪尤長鑒裁在岐也薦齊忠公映佐蕭也薦
盧恭公邁皆至丞相其他推轂下士爲朝廷臣成天下重
名碩望者不可勝書凡所論著皆研幾析理宏雅夷遠洪
州文宣王廟碑張蕭盧三相國碑誌本聖人教化之蹟推
大政蕃明之道固其性術講貫而發舒乎斯文文集二十
卷中倫體要盡在是矣公薨五年錄調爲洛陽尉永惟先
烈未刻豐碑以德輿夙承湖海之舊中忝掖垣之屬他日

舉代靡形話言獲於遺編實見陰德顧茲無似有玷知人
濡涕含毫以表幽宅銘曰

昔在營邱大風泱泱有倬平陽令聲章章不踐宰政貽慶
子姓倉曹含光太學追命厥生中書秉哲居正鵬起扶搖
鸞翔慶霄乃登紫微以瑞清朝吉凶紉纆寒暑結轡其生
有涯其用無極壽堂冥漠冢樹森植揭茲馨香終古是式
唐故楚州淮陰縣令贈尚書右僕射王府君神道

碑銘

并序

天球白珩產於崇山扣之而清越格人莊士生於積德用

之而宏大其或含光而耀藏器不發乃熾而昌是滋百祥
蘊而爲義方飾而爲徽章故太原王公四筮仕而領通邑
五追崇而登端右循政茂於官下湛恩集於身後有繇然
也公諱光謙字某自東漢雁門太守澤五代至晉中書令
獻之坦之歲蕤德名與吉祥侔盛自後魏龍驤將軍長社
穆侯慧龍五代至隋祕書少監邵以勳華文學復大其門
祕書生隋揚州戶曹參軍來戶曹生皇青州司戶參軍子
奇司戶生美原丞贈太常卿慶賢三代沈晦邁其風訓公
卽太常府君之長子也幼而岐嶷長而淳懿絜矩慎獨抱

仁戴義閎深博辯之學稽古禮文之事炳然含章靡不通
貫至若文舒之清修廉實處冲之剖析元微安期之宏恕
懷祖之沈靜合是家法而躬行之始以門蔭受署凡四徙
官曰幽州三水潞州潞城二主簿絳州萬泉縣丞楚州淮
陰縣令所至之邦二千石必加禮慰薦而公牢讓勇退卑
不可踰及爲縣令也務清靜之理而去其煩苦推明誠之
本而教以廉隅一同熙熙生殖阜滋楚風丕變幾至齊魯
因喟然曰彼天爵美祿者在仁義與樽酒而已太邱彭澤
豈多秩耶於是放懷於外嗇神於內沈研象繫之表盤礴

天人之際其致知格物不可詳也以開元二十九年春正月捐館舍於淮陰年六十九其明年返葬於河南府偃師縣北山之陽夫人博陵崔氏贈博陵太夫人繼夫人隴西李氏後夫人同郡武氏贈彭城郡太夫人飾終三加子貴故也公之才子五人長曰翊以博雅典憲亮直方貞歷御史中丞左散騎常侍刑部吏部二侍郎御史大夫贈戶部尚書諡曰忠惠次曰翺吏理詳明官河南府陽翟縣尉次曰翊循良愷悌勲德茂盛厯辰朗容三州刺史容管經畧使兼御史中丞河中少尹朔方節度留後汾州刺史單于

副都護鎮武軍使徵拜京兆尹尋兼御史大夫再居大理
寺卿爲福建觀察使入爲太子賓客貞元十二年檢校禮
部尚書東都留守踐履藩垣逾四十年階至特進爵封本
郡次曰向士行清修爲秦州上邽縣尉幼曰翹文敏有幹
裕歷監察御史三原縣令著作郎太子僕朝向皆不幸早
夭翹亦命屈其志而忠惠公太原公總集休祉爲宗工蓋
臣初忠惠公與肅宗代宗從容言天下事甚衆且曰文致
太平在正名百職危言悃悃痛詆權倖條疏理道坦然章
明沃心前席倚以爲相者數矣雖位竟不致而其遺風直

聲暴乎天下太原公剖符賦政累刻金石滅夷越劇賊開
地靜人倅蒲也以沈機銷急變護單于也以尺書柔獷俗
中外官師俶聲流聞保釐尹正式是東夏安危注意未始
有極言代德者以公之道未光而慶下鍾惟其有之是以
似之之故也初以忠惠公扈鑾輅於岷峨其勤匪懈贈公
隴州刺史又以持節印冊命專對於北方閒關忠力再贈
公祕書監後以太原公南服嘉庸三贈公爲工部尚書以
轂下肅清四贈公爲太子少保以閩方報政五贈公爲尚
書右僕射噫嘻賢人教忠之業令嗣揚名之孝大君追遠

之澤是三者可謂至矣十七年太原公貞於龜筮得二月
壬寅吉於是備八旒七章驚冕佩玉之飾博陵彭城二郡
太夫人以象服祔焉詔給鹵簿官司喪事慶靈集於一門
光耀被於九原君子然後知積德豐報之不誣矣至若忠
惠之子爲守臣太原之壻居台司諸孫昌阜冠映圭組則
列諸碑陰以備代家斲茲琬玉銘公德美其詞曰

有匪君子兮德行醇備蟬聯烜赫兮峻閥宏義觀我靈龜
兮懼腊毒之厚味樹風百里兮馳蒲密之極摯慈和安靖
兮闔境如春仲叔容儀兮與古爲倫全才不耀兮流慶後

昆忠惠既沒兮太原顯尊五加追命兮賁茲元壤隼旗龍
劒兮以至師長澤流根葉兮恩及漏泉壽堂拱木兮以橫
蒼煙隨武可作兮臧孫有後崇岡樂石兮昭晰攸久吁嗟
王公斯爲不朽

唐故四鎮北庭行軍兼涇原等州節度支度營田
等使開府儀同三司檢校尚書右僕射使持節
涇原諸軍事涇州刺史兼御史大夫上柱國南
川郡王贈司空劉公神道碑銘

并序

惟南川郡王諱昌字公明貞師於安定十六歲歲直鶉火

夏五月甲子寢疾病考終命制詔祿以司空印綬而弔祠
法賻稱焉於是內子諸孤宗姻家老盡誠信於內從事大
吏倫侯亞旅展匍匐於外叶志會事拂龜露蓍象數皆得
以條陳纖微必蒙於可報以冬十月丁酉返真宅於京師
某原禮也公之先彭城人楚元王交之後夔國公宏基之
族孫也大王父全慶皇汴州別駕王父達徐州長史父庭
玉試太常卿贈徐州刺史三代醇靜不躋豐祿故天爵覆
露發祥於公公角犀燕頤魁岸碩大思謦泉深盛氣揚休
清明以虛受莊重而強立稟於端誠之謂義發於慮憲之

謂仁揚天聲之謂武節修方任之謂文事再居陪卿三佐
列藩以宮尹中執法以騎省亞丞相冬官宗伯比踐六職
再受鉞而一撫封列王爵而食真賦終於端右飾以論道
其初守商邱援彭城下濮陽壁寧陵釋陳圍復梁野皆急
病肆力威功自著起沮傷以奮擊化怪駭爲休寧其守不
可拔其功不可遏投難而智勇俱殖酣戰而奇正合發兵
法曰有必勝之將書曰存亡在所用其信然乎始從河南
節度使張介然東討林胡殺畧居多次從宋州刺史李岑
扞城半歲劇賊遁去又從臨淮王光弼汧國公勉每用上

效揚於軍鋒洎劉司徒元佐始擁節旄錫宣武之號以族
屬勲力賈餘勇無前凡希烈之自寧陵走汴自汴走蔡以
至於死皆公之爲貞元三年以偏師八千承詔護塞亦旣
旋旆俾營甸圻有尤違者連斬以徇天子壯其忠概未幾
徵還沃心前席饗醴命宥建行師之節制自稟新書分上
相之賦輿留屯便地明年正月進律作藩彤弓元甲物采
備厚因六郡之氣俗用十連之教理入覲宣室請城平涼
屹爲巨防乃拓故地而又險走集以禦寇徙邑居以便人
夷燒塉而制井疆斬荆棘以列達市貨力具舉農戰交修

邊關棄地宴然富殖長幼養老沛然生聚鄰有墜師者濟
之棄甲者納之凡涇人之所未習者皆優爲之涇土之所
未產者皆茂遂之昆夷懾讐燿火訖息彼西土軌道繫吾
謀實然理命不忘於信賞遺章備見其忠惻年止於六十
五未極壽寵皇帝之所以恤然加等良有以焉夫人吳國
夫人陸氏柔嘉綢直婦道明備長子殿中侍御史贈潁州
刺史均教忠能仕不幸蚤夭嗣子右威衛騎曹參軍士涇
懋善有訓行與支子右衛率府兵曹參軍士慘泊士良及
士和等以德輿嘗受面命類涇人聲詩馨香始終其傳信

也熟將篆樂石載徵非詞中郎二碑竊善頌於無愧春秋
五例冀終義於後經銘曰

疊疊南川得時經武大君有命式是西土西土濯征衆心
成城壽甲瑯戈涇師以貞隼旗驚冕涇俗以寧肆厥忠力
秉茲義程凡在五符至於白徒制爲田廬亦有賈區實墉
實畝交贊令圖嘉生油油比屋愉愉昔誓偏師士皆致果
如使臂指可蹈水火孰云危事決勝在我狂猷內訌惡氛
濛濛濁河而南或守或攻陳壁旣捷夷門乃通時惟南川
實冠羣公乃分兵符乃鏤彝器服物昭庸天休滋至勞動

心力宏大功利師則嚴終公惟盡瘁智氣冥冥發揚昭明
下平水土上助神靈輅葆參差邱封崢嶸立此堅石於昭
厥聲

欽定全唐文卷五百目錄

權德輿 十八

尚書度支郎中贈尚書左僕射正平節公裴公神

道碑銘

并序

故太子右庶子集賢院學士贈左散騎常侍王公

神道碑銘

并序

故鄜州伏陸縣令贈左散騎常侍王府君神道碑

銘

并序

故中散大夫守尚書右僕射上柱國賜紫金魚袋

贈太子太保姚公神道碑銘

并序

故尚書工部員外郎贈禮部尚書王公神道碑銘

并序

故中散大夫殿中侍御史潤州司馬贈吏部尚書

沛國武公神道碑銘

并序

欽定全唐文卷五百

權德輿 十八

尚書度支郎中贈尚書左僕射正平節公裴公神

道碑銘 并序

王者奉三無私以勞天下則崇德報功加恩飾終與覆載
照臨相爲用一也惟正平節公以愷悌文敏爲二千石尚
書郎人浮於食位不配德纂積後之緒業貽克家之燕翼
流光裕蠱爲代師式乃元和二年夏五月追命告贈爲尚
書左僕射孝本乎忠榮生乎哀用攄罔極以刻金石云公

諱倩字容卿河東聞喜人其先嬴秦同姓因封受氏魏晉已還號爲多才八賢方駕百族歸重自魏冀州刺史徽五代至中軍將軍雙虎中軍五代至隋左光祿大夫皇朝贈原州都督忠公仁基忠公生皇銀青光祿大夫禮部尚書定襄金牙兩道節度行軍大總管贈太尉聞喜憲公行儉公之曾祖也憲公生皇光祿大夫侍中兼吏部尚書宏文館大學士贈太師正平忠獻公光庭公之王父也忠獻公生皇尚書祠部員外郎贈太子賓客禎公之烈考也公天姿宏裕虛受通理臧氏之有後於魯管氏之代祀於齊遠

至之器發於岐嶷年十一以相庭推恩授家令寺丞滿歲
選部銓第甲乙補太常寺主簿居先府君喪水漿不入於
口孺慕殆於滅性宗門憂其死於孝禮文俯就衣服外除
厯華陰馮翊二郡司戶參軍轉祕書郎俄丁內艱毀瘠如
初禮違難江介就拜洪州司馬改太子司議郎徵爲殿中
侍御史拜度支駕部二員外遷司勳郎中祕書少監厯信
饒二州刺史復徵爲度支郎中其佐鍾陵也領留府之重
居議郎也贊計司之職暨登中臺亞中祕皆兼柱下方書
之任自淮而南涉江而西荆衡漢沔湘中夏口半天下奧

壤爲都府者十數公四顧使車連佩數印督課郡國調其
盈虛吏祿兵食之仰給輸將轉漕之回遠法錢牢盆之制
田租口賦之差權其輕重商其功利察下人之疾苦廉長
吏之善否車不輟鞅有勞於時其始受命也寇劇橫厲三
川如燬陰方出師募義助順代宗焦勞念慮命德宗以雍
邱總戎賦輿所會征繕不給有詔輟東方軍市之租移用
於中都屬受鉞之臣矜功缺望師老專利便文自營公慨
然牒書譏切備至嚮之廢格悉用平鬴義夫以之感激王
旅以之震躍其理信州也用寬惠誠厚輯柔所部穡事滿

野嘉禾同穎年以順成人斯洽和復其庸亡五千室闢其
農耕二萬畝交代之日不書於簿且曰吾以恤隱豈當沽
美不伐之善欲蓋而彰方帥表理行第一增秩至正議大
夫加金印紫綬其為饒州屬所代者非其人因緣權幸貪
猾無狀公以廉平頒詔條以慘怛撫痍傷四封愛戴如熱
斯濯其後徵拜也朝廷誅內臣修百度彌綸經費委重有
司公以郎吏代故相第五琦專判度支事方冀裁成九賦
超贊六職以美利利斯人令望日大天胡不惠以大厯七
年秋七月考終命於長安光德里第春秋若干以某年月

日歸全於萬年縣神禾原之大墓禮官博士以公處難不
謀其身牧人不私其功能固所守以行制度易嘉名以旌
往行禮也惟公直而溫簡而文才裕於物器周於用靜若
著龜動如干鑠秉是貞厲終焉節適著文集十卷湓城集
五卷比興屬和聲律鏗然引拔參佐皆一時名士風采資
材邁絕羣倫齒位未極爲薦紳所痛夫人京兆韋氏扶風
太守恒之長女以大宗之家人諸侯之內子衿聲承訓籙
豆助祭當室以敬睦親以仁姿操卓淑音徽宏大盛德著
於母儀惠心通於佛乘五蘊不入六姻是憲始封咸寧郡

君後三追錫至邠國太夫人有子曰均以御史大夫工部
尚書尹正荆門節制上游就加吏部尚書右僕射元和三
年抗章入覲真拜右僕射判度支加秩金紫光祿大夫由
河東郡公進封郇國歲中進左僕射同中書門下平章事
撫征漢南臨長諸侯惟郇公直清宏重有文武楨幹得時
大行爲王室輔慮善以動官修其方賦政以惠南國宣威
以靖西蜀師長百工阜成中邦兵符將印焜耀章灼樹善
程能之績勤身體遠之用居則有猶動則有功率循風訓
以復尊大君子曰憲公忠獻公之休烈丕矩再世盛德屈

於郎位必復之慶其在是乎初郇公之授律也孝文追贈公絳州刺史其進律也順宗贈公禮部尚書今皇帝永懷義方於是有左揆之命公之積慶郇公之孝思可謂至矣郇公以三代論謨皆上台雄文猥以通舊忘其卑鄙辭則不腆庶傳信之無愧焉銘曰

河汾之東慶祉所鍾公相歲蕤德耀昭融矯矯節公體仁修性乃貽後昆實稟先正太尉經武太師翼聖施於儲賓執德之柄公用循良惠於二邦公有德澤宣於四方急病尚仁履險乘剛化被煩苦斯焉樂康吉祿方摯壽堂已闕

藹此家聲揚於令嗣恩崇鼎鉉績茂師帥中外服勞安危
注意便蕃屬任宏大名器孝理是覃義方所自九原之中
禮盛服充王三錫命祔飾宗工連岡崢嶸介原穹崇陵谷
有變令聲無窮

故太子右庶子集賢院學士贈左散騎常侍王公

神道碑銘

并序

興元元年春二月太子右庶子王公艱貞歸全於京師新
昌里夏五月王師震耀侵沴銷散天子以公忠義風節可
以聳勵人臣追命左散騎常侍且詔有司護葬加禮冬十

一月寧神於咸陽縣肺浮原先公之兆域旣葬十二歲其孤仲周以德輿昔在羈州獲見於公無容之敬嘗拜於牀下乃泣狀代德俾表識於神道云公諱定字鎮卿京兆人其先魏信陵君無忌之後秦滅魏謂之王家周太尉尚書令熙以勲勞閭閻爲藩衛威重從太尉三代至隋司金上士邢孟洛相等七州刺史明進明進生同州河西縣令喜喜生蒲州長史贈禮部郎中慶慶生吏部侍郎揚州大都督府長史贈禮部尚書揚州大都督易從積是德善叢滋彰大公卽尚書第若干子弱冠游太學舉進士甲科補太

子校書以文雅盛德名聲四暢屬執事者用喜怒爲刑賞
上蔽天明婚親坐累微文痛詆厯湘潭藍山雲夢鹽城四
邑之屬天寶末違難家食於淮湖閒四征五府聘問狎至
某年中書元載廉問九江表公爲介授右驍衛兵曹參軍
以疾乞告不屑就無何元拜小司徒執憲乘軺實顓徵令
復表公爲大理評事奉詔踵門詞禮皆切不得已而從之
恥驚功利每稽中正酌輕重之法通方圓之宜叩雖應於
春容技寧投於肯綮纔逾旬朔復以疾辭時薦紳先生多
遊寓於江南盍簪清議以天爵爲貴退然絜矩名動京師

宰相得君且務樹善俄除監察御史不樂拘肩換太子司
議郎公望寢盛徵書累下不就朝論以九遷是望大僚之
七發相繼拜起居舍人尋加理匭使歷禮部吏部二員外
於是昭法誠廣聰明裁百辟之章疏治九流之刀尺私回
屏伏公是興行遷考功郎中每歲覈羣吏之能否書其上
下之籍有司賦祿此焉質正吏詐諉以嘗巧法靡密而不
勝公乃大爲之防盡去其弊於是選部以稱職聞或賀之
者舉手曰此考功之力也豈敢攘善尋以本官知制誥歲
中遷諫議大夫掌誥如故且加命服凡贊書名命必輔以

精誠其旨在於奉菁華而去枝葉故簡實體要不爲蔓辭
明年宰臣伏法移太子洗馬今上嗣統東求吏師授隰州
刺史以南京歸重尋拜吏部郎中再授方面命循行方國
初自淮淝至於汝南後自上黨亘於山東辯逆節以致誅
宣王澤以宏化德立刑行時公之功遷太子右庶子集賢
院學士或歎以才全位散非公所宜者公蹙然曰此予仲
父之職官也竊懼不稱豈必使濡翼腊毒然後爲得耶明
年冬上思避狄之亂玉虬西狩公聞挈二子奔扈行宮在
塗發疾爲凶黨所得不敢加害劫送京師元惡惜公素名

汙以右職桀犬日至盜言孔甘不時赴就期以大戮公瞑目噤口其心確然私謂所親曰忘君恩以苟生非忠蹈賊刃以誅死非孝於是藥攻五臟艾灼四肢耗其神形終啟手足任重道遠君子以爲難前此理命其子曰吾嘗被冕服近天子之光不能酬恩刷恥而遭罹執劫得正而斃猶生之年但慮竊國泉以賻我義無所受勿使僞命汙吾之行口占遺表言終而絕禮盛服充追崇身後君君臣臣其至矣哉故尚書吏部郎中趙郡李公洎公皆德輿先大夫之執也李公嘗稱公交道之深評議之正天下之人以爲

知言前夫人京兆韋氏刑部尚書贈太子賓客堅之女繼
夫人隴西李氏右金吾衛將軍資州刺史延業之女龍旂
麟趾之慶重於淑哲皆叶公之志而先公之歿長子逢以
進士宏詞甲科厯咸陽萬年縣尉監察御史殿中侍御史
佐制河東之畫才名休茂不幸蚤代幼子仲周亦以進士
甲科使車交辟以廷尉評攝監察御史佐元侯外任實商
功利利用敏職文行修明論撰先烈炳然詳實故採獲始
終用成斯文銘曰

大玉孚尹慶霄綢繆有卓王公清方直溫考績中臺吏理

有倫密侍右掖化成人丈時或屈伸道無緇磷別殿清近
東朝顯尊盜泉滔天猛瘳狷狷不虧其全不害其人凜凜
風節追崇厚恩玉印金貂祿於墓門家法憑厚慶叢後昆
纂敘德輝敬而不諼岡連夏屋木拱秦原傳信貞珉令聲
無垠

故鄜州伏陸縣令贈左散騎常侍王府君神道碑

銘

并序

國家以孝理天下褒有功之臣寄崇元侯澤及先子印綬
名器貴於冥冥繇是王公三受追命有金貂附蟬之飾公

諱崇術字敬方其先太原晉陽人晉司徒渾之後也中以
閭閻徙於帝邱今以名數籍於轂下曾王父皇集州司倉
參軍元素元素生朝散大夫滑州衛南縣令瓊瓊生蔚州
司法參軍宏效皆用儒行自守故纓轂未華仕不過郡掾
史縣大夫而休問四暢公卽司法府君之子方嚴密靜忠
厚溫克覽六籍三畧如見古人之心開元中舉孝廉仍歲
爲有司所詘因罷卷慨息慕班超傅介子之爲人遂從河
西節度杜尚書暹撫劍相合一命昭武校尉蘭州金城府
別將再命鄜州修武府左果毅都尉伐謀決勝多以咨之

居戲下數歲因喟然曰務功伐而違敬養豈吾之心耶陟
杞倚門慈戀交感乃嘉仲由而罪吳起去危事以承歡顏
旣至郡按察使表其義行可移於教化有詔試守鄜州伏
陸令爲之三年禮俗休和有怡聲出有循政熙熙然千
室以仁遂焉雖宓不齊之理單父庚桑楚之居嶷嶷不是
過也察廉薦延者方因公以俟上賞俄丁太夫人憂喪期
斬焉闋而猶毀又喟然曰嚮所以不擇祿者備饘羞耳今
則求志豈靳畜於樊中耶於是善閑以葆其身教忠以大
其門語仁義於燕閒集寵嘉於後昆以天寶八年春正月

考終命於濮陽縣享年七十二嘉耦北平田氏夏州司馬
藝之息女淑慎柔正宜於家室後七歲沒於徐州有子三
人長曰奇哲倣沈勇與河內尚衡扶義於河南積功勞
至恒州刺史蹈難以沒不害於仁次曰棲榮亦以忠力策
謀至左威衛將軍幼曰棲曜寬明博大有文武畧左右征
師炳著威功埽蠱毒於姑胥靜鴟誼於夷門興元元年以
太子詹事加御史大夫繇太原縣侯進封瑯琊郡王貞元
三年從晉國韓公來朝京師拜輔國大將軍左龍武軍將
軍明年又以御史大夫爲鄜坊丹延等州節度觀察等使

十二年就加禮部尚書納忠服勞考禮修職克稟風訓爲
時翰垣旋觀賦政之府乃公筮仕之地感霜露於怵惕展
蒸嘗於吉蠲蓋貽慶考祥必有所自不然何回復宏大於
是邦耶初大厯十年朝廷以尚書偏師策勲贈公開州刺
史貞元九年又以撫劔宣力贈公宋州刺史是歲天子以
一純二精大饗報本其明年贈公左散騎常侍夫人始贈
北平郡太君再封北平郡太夫人至是三加爲燕國太夫
人十年十月追錫之車服器用改葬之祔輅合祔於濮陽
洛城鄉全義里之西原先是尚書旣得吉卜如始居喪之

感累章請乞親壤樹土以戎閫委重俾其子正元往襄事
焉噫嘻追養繼志有哀有敬義方啟迪之遠纂服裕疊之
盛蕃衍昌阜叢於子姓宜哉斲石舊封以攄德善其銘曰
仕不必貴難乎其備抑抑王公修仁踐義戎昭再命宏厥
武事美化一同炳然文吏燕居就養消息恬智從心之年
亦已過二沒代流慶密章下賁北追劇藩乃進常侍婉彼
燕國柔嘉樂易光協閨門克昌後嗣蟬冠象服同穴茲地
金石繫辭式昭遺懿

故中散大夫守尚書右僕射上柱國賜紫金魚袋

贈太子太保姚公神道碑銘

并序

公諱南仲字某吳興武康人姚墟鳩水根柢峻茂後漢青州刺史恢始違難東徙周華州刺史北絳郡公僧坦以行義道術聞生二才子曰察曰最最仕隋爲蜀王友六葉至公曾王父績仕絳州曲沃縣令王父元宋州宋城縣令烈考發天寶中舉秀才十上不合慨然自奮從西平王哥舒翰於隴上積功勞至右領軍衛將軍他日以公之勤贈國子祭酒公抗行厲操清方謙儉以規爲瑱以禮爲興以多文爲富以不貪爲寶潔如大圭鏗若黃鐘宏毅以任重溫

良而能斷自射策筮仕至於綏吉祿啟手足繇是道也其
初應制條對理道授太子校書內史吏部表其才能凡三
結黃綬至萬年尉前後考課爲府中最擢拜右拾遺久次
厯右補闕發文石封阜囊諷議十年彌縫百度大厯中中
宮憫冊旣卜壽原陳古義以上達疏近郊之非便卽日詔
可下其章於宰司特超五階被以命服執事內詔以上賀
近臣修職而競勸服薦紳者誦之執簡記者書之尋以本
官充理匭使今皇帝嗣位之初慮化不下究以通邑長人
導利之源出爲蘇州海鹽縣令韓晉公滉時總方任延於

幕庭改殿中侍御史興元歲大輅省方深燭理本東求俊
又徵詣行所泊清宮旋蹕拜左司員外郎紀綱品式練達
明備轉兵部員外郎時武師告成侵沴肅清四征羣帥條
上功級材官勇爵差次賞典受命顓達疇庸式敘遷本司
郎中凶旱之後被邊糴食近關蒲晉十餘城之地因其徵
令悅以平糴乃董使車贏糧息人拜御史中丞歲中換給
事中正色匪躬清公不苛大朝以肅右曹亦理明年授同
州刺史三載考績復以御史中丞領陝府長史陝號觀察
使居五年就加右散騎常侍左輔有離宮公田之劇焉陝

服居函關砥柱之衝焉於二千石元侯之選斯近而重賦
政廉平馨香流聞以修班制以厚風俗上以靈昌居兩河
之郊鄭爲支郡是皆要害且今勁兵處也自丞相魏國公
政成入弼厥後守臣再物故而魏公之澤寔遠思得寬明
忠智之長以輯柔之進公左散騎常侍御史大夫爲滑州
刺史鄭滑節度使於是握兵符乘單車惠然簡易入布條
職恤鰥寡用仁制強禦用明居常以柔克臨事以貞勝士
吏悅勸夫家寬息阜俗成師納忠閑邪眾情皆懽而公益
厲十六年介圭來朝牢讓師帥繇是詔魏公以左僕射居

相府命公爲右僕射公旣得請命其軍司馬盧羣以代焉
爲仁由已是稱方國之表知臣者君乃膺師長之任詔奉
常具儀法以莅中臺禮官贊引宰政爲客諸曹羅拜於堂
下郎吏捧牘於階序禮成渥縟秉直者榮之虔奉朝請恪
居官次慥慥然守業修職未嘗以耆碩尊禮自處山甫之
匪懈考甫之益恭古人與稽華髮彌固十九年秋七月乙
亥感疾薨於宣平里第享年七十五天子廢朝悼歎俾中
貴人弔祠追命爲太子太保恩之所加可勝言哉惟公粹
和而能貞厲恬淡而有儀矩履方持重坦坦光大詩曰愷

悌君子求福不回言樂易而不違於道也又曰靖恭爾位
好是正直言遭明君其道行也斯二者君子謂公得之夫
人河南縣君元氏魏景穆帝之裔宣州錄事參軍光宗之
息女也和易淑柔以肥家道先公而歿十八年矣嗣子太
僕寺主簿袞潔清好古誠信得禮與其弟亮茹荼問卜以
閏十月己酉奉公之喪與夫人之殯合祔於少陵原黃渠
里以儉襄事率循家法雖宗姻四布皆泣而辭之且曰理
命也猶懼先人懿實寢而不章刻茲穹石以永終古銘曰
黃目鬱器禮神所貴佩玉金龜君子是衛秩秩姚公其心

秉彝抱義戴仁造次無違公之所履中立不倚廉車淑旂
所嚮風靡政無吐茹道若砥矢事君愛人斯謂至矣中臺
崇崇端右宗公皇明嘉獎陟是師長卓爾道行渺然化往
少陵鮮原美檟新阡龜筮告繇塗芻儼然白驥蕭蕭黃渠
漉漉姚公之德兮揭此貞堅

故尚書工部員外郎贈禮部尚書王公神道碑銘

并序

今皇帝始初清明永貞紀號追命故工部員外郎王公爲
華州刺史改元元和之明年再命爲禮部尚書裕蠱之風

訓漏泉之慶澤父所以教忠於子臣所以移孝於君人道之極盡於是矣公諱端字某太原人曾祖景肅皇澧州刺史祖威德州司馬父思獻襄陽令公方嚴有志尚沈粹潔清不流於俗舉進士宏詞連中甲科授崇文館校書郎累遷監察御史殿中侍御史工部員外郎其於奉朝請之外或介隴坻或留洛邑以疾乞告遇安祿山反書聞南浮江湖自適其適乾元己亥奄至大病悲夫自開元天寶閒萬方砥平仕進者以文講業無他蹊徑薦紳之倫望二臺如登青天公與河南元德秀天水閻仲璵同歲中正鵠其後

冠惠文趨建禮憲章奏議與名聲俱當時士君子猶以未
充量爲歎其文峻清不汨於波流者還一齋記惠上人碣
銘微妙虛空深入無際嘗與故太師顏魯公暨柳郎中芳
陸員外據殷永寧寅爲莫逆之交陸嘗言王之莊柳之辯
殷之介皆希代鴻寶知言者以爲實錄有三子長曰綽入
道精修爲桑門上士次曰紓以文行篤實厯右補闕起居
郎右司員外郎庫部郎中次曰紹本名犯皇帝諱而更焉
忠厚宏裕爲德宗所器厯任戶部侍郎戶部兵部二尚書
咨俞闕決過於宰府大政密議須其一言持平以有守樹

善而不伐天下之人謂之長者睿聖繼明以檢校吏部尚書爲東都留守東都畿內防禦使以檢校右僕射爲徐州刺史武寧軍節度使元和七年入覲復爲兵部尚書俄判戶部事四征六職烜赫尊大故公再有追錫之命夫人亦累贈隴西郡太夫人龍泉魚軒賁飾于冥冥之下名教德器有哀有榮孝理之感人深矣初公之捐館也行次信州瘞於玉山前此夫人沒於洛師寔於潁陽僕射竭其誠信日月有時矣不幸薨落理命其三子嗣事焉繇是僕射之孫曰門下省典儀元泰試大理評事攝監察御史元質右

威衛倉曹參軍元弼等窮毒在疚護王父母之輅車閒關
跋履泣問著蔡以八月某甲子祔於萬年縣鳳棲原克纂
先志禮無違者而又哀請父黨篆茲祖德永揭神道用愧
蕪辭銘曰

懿懿王君黃中有文清時發身舒翼卿雲執憲平明含香
秘飭慶靈下鍾復大其門追錫儀曹徽章顯尊鳳棲古原
龜策不謖泣祔雙魂禮成孝孫刻銘斯碑君子之墳

故中散大夫殿中侍御史潤州司馬贈吏部尚書

沛國武公神道碑銘

并序

種德考祥賢人積厚之業尊仁安義君子揚名之孝其敬
養也諭之於道其貽慶也教之以忠宏保乂於元臣集寵
靈於追命見之於尚書武公矣公諱就字廣成沛國人周
室之興本於忠厚趙王之裔厥有勲賢元魏步兵尚書鴈
門朔方雲中馬邑四郡太守洽啟封晉陽田祿益大生國
子祭酒受陽公諱神龜受陽四葉至太原王諱華太原生
鄴國節公諱士逸節公生河閒郡王諱仁範河閒生潁川
武烈王諱載德代以文武上才爲將軍二千石識芒碭之
氣密贊皇圖承沙麓之祥分封戚里潁川生考功員外郎

修文殿學士諱甄字平一以字行於時未弱冠有重名閎
覽博學爲人文龜玉在天后朝累徵不起以公族好爵爲
懼常晦其明與桑門大士修無生法中宗復辟甫踐周行
載筆論思特盛淵雲之選賦詩感激必以昌霍爲誠雖位
有陟降而道無磷緇叢滋後昆纂服遺烈公卽考功府君
第三子也肅而清簡而廉忠方伉直信厚強固博洽文誼
周通憲法始以方聞之士對詔策佐宮衛李梁公峴之守
右扶風也表爲兵曹掾宣皇在岐供待有勞改永樂令厯
河中府戶曹轂下求吏轉萬年丞建陵復土推擇充奉拜

醴泉令朝廷嘉其才擢爲殿中侍御史修起矩度堅明不
回時朝廷戎車方駕泉貨力屈皇華載馳董荆衡漢沔之
賦以嚴見憚爲吏議所侵貶郴縣尉句容丞二地有南嶽
三茅靈仙遺跡於是浩然自得以道爲徒方解纓紱以暢
天理且曰窮與通在吾靈龜耳外物其如予何本道觀察
使挹其風聲薦授祕書郎潤州團練使入爲京兆法曹加
中散大夫忽忽不樂求爲潤州司馬滿歲徙家嵩洛愈尚
夷曠中朝名卿大夫四方賢侯通人多與公爲道義之交
賈太傅魏公用清靜理東郡以蓋公待公亦旣戾止俄然

化性時貞元六年冬十一月享年七十八理命終制視道
門儀法以明月之晦降體魄於邛山北原有靈鶴百數徊
翔嘹唳其休徵歟其元契歟惟公以文學政事莅官十二
次冠神羊駕四牡剛腸正詞臨事風生君子之方有迕有
合或忌公之直或愛公之才行藏牽乎時而道不屈得喪
宜乎已而神益王嘗與張禮部謂元容州結歌詩唱和著
文集五卷自有塗中之適異乎澤畔之詞前夫人隴西李
氏生長子譚而歿譚爲金壇令士行清修官屈其志繼夫
人汝南縣君周氏中書舍人思鈞之孫單父令瑛之女專

柔淑慎以正家道有子曰元衡文行宏懿靜深周密遵道而行有儀可象代天工以熙帝載賦明命以贊皇極元和三年春正月由戶部侍郎拜門下侍郎同中書平章事秋八月兼領戶部侍郎事冬十月又以門下侍郎檢校吏部尚書成都尹劔南西川節度觀察西川八國瀘南安撫等使自文水縣男徙封至臨淮郡公上以井絡之下新去湯火亦旣震耀是圖生殖於是輟台宰之重爲慈惠之師黃樞金鉉鉞鉞秬鬯旬歲閒三錫命烜赫嘉會綢繆樞極信賞禮賜冠於羣倫豈非公之道阨不申而昌大於後抑義

方家法固有類乎公捐館四年而夫人歿其明年臨淮公乃舉公之寔與夫人之喪改葬緱氏潁川王之兆從先封以敘昭穆禮也初臨淮王至監察御史而孤其後再爲中執法朝典覃恩贈公杭州刺史其司大政也再贈公吏部尚書夫人始追封文水縣太君益封汝陰郡太夫人顧復罔極之報哀榮歸厚之禮成於德器名教稱之臨淮公考功府君之謫掾於吳也與德輿王考府君有僑札之歡油素斯在清徽未泯德輿獲與相君交代爲地官小司徒陪外廷之末議承宰府之寬政有命論譔忘其菲薄刻茲樂

石以表鮮原銘曰

君子之道剛方絜矩或消或長或默或語於惟尚書執憲
天朝密侍殿內肅清羣寮鋒銚肯綮湖海飄飄以恬養智
無落吾事脗合虛元脫遺聲利題劔告第寵靈斯備元袞
介圭流光所自煌煌台司天子是毗廕庥岷峨灑濯癘疵
視此忠力無非孝思緱氏峻原兮幽宅悠久崔嵬介石兮
天矯螭首鏤嘉聞兮以示厥後